

Jaorverslag Vastelaovesveriëniging 'De Spurriemök'

Seizoen 2010 – 2011

Ut seizoen van Prins Martien d'n Urste en Prinses Jessy, Jeugdprins Dennis d'n urste, Jeugdvorst Tim en Jeugdnamrin Nicole.

Ut seizoen van enne Mök den an ut begin van ut seizoen geblust wier en an ut eind angestokt, as ut lèste seizoen van Jan en Fabian, as ut seizoen van Vandaag en Alaaf!, as ut seizoen van Liset, as ut seizoen van goei wèr en genne snej, as ut seizoen worien de prins en prinses d'r tiggengan gun, ut seizoen van nog enne kier of 25 Alaaf!, en wer as seizoen worrien we en fantastisch fiëst gehad hebbe, en misschien wel vur de lèste kier, volges de Prins.

Ut bestuur bestoond uut:

- Vurzitter Hans Loonen
- Vorst Emiel Evers
- Penningmèster Robert Steeghs
- Sik Eric Flinsenberg
- En de bestuursleje Rob Pluk, Martijn Drabbels en Jos Willems

De Raod van Elluf bestoond dit jaor uut:

Jan Classens, Fabian Voermans, Erwin Steeghs, Stef Claessens, Jop Loonen, Pascal Classens, Freek Smulders, Vincent Verstappen, Bart Jenneskens, Willem Arts, John Voermans en Tom Loonen. De lèstgenoemde het, helaas zonder succes, geprobierd um ien Australië adverteerders vur de krant te viende.

We begosse ut seizoen, hoe kan ut ok anders, mit d'n **11^e van d'n 11^e**, of volges vorst Emiel 315 Januari.

Umdat ut buute règende wier de planning iets veranderd, mar dat moog de pret nie drukke.

Ok dit jaor was der wer goed naogedocht ovver en moje opening vur dit seizoen.

Terwiel Vorst Emiel 11 regels oplaas wiere den mök, en en paar meense die te dichtbej stoonde, gezègend dur Prins Ron. Ut zeuj natuurlik moj zien as dit uut zeuj groeie tot en moje traditie wor iederiën gèr bej wil zien.

Ok hebbe de 2 neje raodsleje zich vurgesteld: John en Willem. Wat vurral opviel was dat ze èrrig goed te sprèke ware ovver ozze Vorst.

Ok het Vorst Emiel os nog efkes al ut lèste nejs verteld, zoëdat wej niks hoefde te misse.

2 daag latter. **13-11, ut Vorsteraodsbal.** Dit jaor was ut ien Aostrum. Mit en groëte delegatie ware wej hier wer bej. Nao alle onderscheidinge en herdenkinge kwame alle vorste, vanaf dit jaor 14 stuks, an ut woord. Ozze eige Vorst Emiel kwaam pas as 1 nao latste an de beurt. Hej haaj en moj stuk mit schèrpe grappe, en wej ware ut dr toch allemol ovver èns dat hej toch iën van de, zo nie **den**, bèste sprèker van den aovend was. Nie alliën umdat hej en kei goed verhaal haaj, mar ok dur ut feit dat hej van de latste 5 as ennigste nie mit en dubbele tong praotte.

Nao al ut gepraot was ut tied vur de band 'Aacht vur Elluf', al ware die wel te laat want ut was al hallef 12. Mar kortum: Ut was enne lange mar enne gezellige aovend.

26 en 27 november, Bonte Aovende.

Regie: De bonte aovend commissie onder leiding van Vincent Verstappen.

Ceremoniemèster: Vorst Emiel

Goede Tijden Slechte Tijden-update: Vrejdags dur Vorst Emiel, zaoterdags dur Ruud Zanders

En achtergrond-geklap: De raod van elluf onder leiding van Willem Arts

As urste wiere de twië neje raodsleje vurgesteld, alliën mosse ze nou min of mier mekaar vurstelle. De jonges han goed opgelet mit d'n 11^e van d'n 11^e, want ut ging ze vrej goed af.

We begosse mit en stukske drums zonder drums. De Showdrums Oeldere mieke en moj stukske muziek mit bekerkes en tôffels.

De APK haaj ok en moj stukske muziek, enne prachtige smartlap, en op ut scherm kwaame allemol mojje foto's vurbej, en dormit bedoel ik de kwaliteit dervan.

Dornao kwaam Berry Knape as de jurrige Job ut podium op mit enne mojje buut.

En toen kwaam dr nog en moj stukske Oelderse ienbreng. De bruurs van Barney, bej os bèter bekend as Marco en Peter, kwaame os en verhaal vertelle wat ze zoëal mitgemakt han ien hun carrière. Wat os betreft goëide ze allebei 180 punte mit hun mojje optreje.

Vervolges ginge we verder mit en nèje uutzending van Radio Oeldere 11 FM, mit DJ Freek, DJ Ruud en DJ Wout. Ok hun huusorkest bestaonde uut Thei, Math, Piet, Suzanne en Jenny was der wer bej, en d'r wier wer es flink geroddeld ovver wat dr allemol wer gebeurd was ien Oeldere ien ut afgeloëpe jaor.

Dornao kwaam ennen echte sukkel ziene buut halde. Hej kan dan wel zegge dat hej enne sukkel is, mar zien verhaal vertelle kan hej verekkes moj, want we hebbe toch duk kroom gelège van ut lache.

As afsluuter han we dit jaor de Penthouse Boys. Ik vraog mej eigenlijk of we dor korting op hebbe gekrege, want we mosse enne hiële hoëp zellef doen. Serenades brenge, zinge en dinge die op muziekinstrumente leke bespeule. En as ge ok mar en hiël klèn bitje opvielt dan warde al gauw de klos. Ton en Lia Nabben, Patrick van de box, Marian van de Stef en Haaaaaaaaaay Steeghs, is mar en klène greep uut de meense die dees Boys wel nie gauw zulle vergète.

Al mit al ware ut wer twië hiël moje aovende, waoran nie te zien was dat d'r vurrig jaor ennen hoëp ervaring weg is gegaon.

En urges ien december kwaame der allemol bordjes mit vraogtèkens as paddestuul uut de grond. Dees ware der nergezet dur de anonieme helleper van vorst Emiel, den iedere wèk en stukske ien ut krèntje schreef. Ge hat 3 kleure bordjes: Roed, Gèl en Gruun. As ge en roëj bordje ien owwe tuin hat, wiste zeker dat ge gen prins wierd. Hadde en gèl, dan warde en twiefelgeval, en mit en gruun bordje dan miekte veul kans op en muts mit vère.

Zondag 2 jannewarie wier d'r wer prins geraoje.

Ut is wer allemol goed verloëpe, ok de extra taak um begunstigers te vraoge vur ien de carnavalskrant. Dit was mar eenmalig, want vollegend jaor duun we dit tegeliekertied mit advertenties ophale. Helaas ware dr dit jaor nie zu veul posters op de ruute te zien. Toch wier dr druk grikraojt ovver wie de neje prins was.

Zondag 9 jannewarie was ut dan zowiet. Prins Ron zeuj ziene mantel en grei ienlevere, en 'smiddags zeuj dn neje prins ut aoverneme. Sommige meense ware dor bliekbaar hiël blie um. Ien d'n Terp begosse we mit ut aftreje. [\[KLIK\]](#)

Ut was behuurlik druk en dat zien wej gèr. Ex-Prinse Rob, Vincent en Jos dun nog en moj stukske, en miéke ut geheim bekend wurrum Ron um toch zu kneep op de foto's. Dornao de uutreiking van de proclamatie, de lèste speech en ut echte aftreje. Ok wier Ron lid van de APK. Ze wille dor ok iederiën hebbe.... Toen ut aftreje we achter de rug was en Prins Ron wer gewoën Ron Sanders ginge wej mit zien alle nur de Liende. Langzaam begos ut drukker te werre, en toen de Bühne ope ging zage we dor en prachtig decor as de studio van 'Ik hald van Oeldere. Ok is toen enne neje gelieknamige Oelderse hit gebore.

Emiel riep 6 kandidate nur baove, te wiëte: Ruud Zanders, Erwin Steeghs, Johan Craenmehr, Gerrit Bardoel, Eric Flinsenbergh en Jop Loone. D'r wiere allemol vraoge gesteld, en ien vur ien viele de diëlnemers af. Net toen ut spannend begos te werren en alliën Gerrit en Jop nog aover ware ginge ze nur de reclame. Ge zut dènke dat ut SBS6 was die de uutzending deuj, mar dat was ut nie. Wel het Piël en Maas TV alles opgenome, die kwaame efkes kieke bej de mojste veriëning van de hiële gemènt hoe ut dan echt mos.

Mar de reclame was nog mar net vurbej, of Emiel begint mit ut oplèze van de 11 regels. En toen kwame Prins Martien mit zien prinses Jessy bijna letterlijk mit de deur ien huus gevalle. Emiel miek nog en hiël klèn foutje, mar tot daor ging alles goed. Toen enne groëte polonaise en de prins en prinses ien de nek.

Dornao was ut de beurt an de jeugd. D'r wiere ennen hoëp vraoge gesteld dur Emiel en die wiere beantwoord mit en roëj, gèl of grun bordje, die op hun beurt wer jao, twiefelgeval of nieje betèkene. Nao en vraog of 15 wis hej ut zeker en kwaam ut jeugdtrio uut:

Jeugdprins Dennis d'n Urste, Jeugdvorst Tim en Jeugdprins Nicole!

Toen wer enne groëte polonaise en ut trio mit de hiële jeugdraod wer ien de nek. Toen was ut tied vur ennen hoëp felicitaties en nog en groet fiëst. 's Aoves wer ekkes nur de soos wor ut is enne kier nie hèt was, mar helaas ok nie druk. Dornao nur d'n Terp, wor nog ekkes naogebuurt wier.

Zaoterdag 15 jannewarie het prins Martien ien zien prinsemuts âld papier opgehâld.

Zaoterdag 22 jannewarie zien de kammeraoj en de Mök is los ekkes bej um komme kieke of hej zich wel goed schon haaj gebadderd. Dornao zien ze nog nor d'n Terp gewist en hebbe ze en moj fiëstje gebouwd.

Zaoterdag 29 jannewarie. Ald wieverbal.

- Ten urste: Wer en goeie band, Aacht vur elluf, dizze kier te vroeg, namelijk um elluf vur aacht.

- Genne snoep en grei mer, mar wèrme snacks. Dit beviel de mèste meense hiël errig goed, want dur is bijna niks op de grond gegoid. Hierdur was ut ok wer minder glad, en win-win-situatie dus.

- Dit jaor ware de prieze ok enne kier nie ètbaar. Alliën jommer dat lang nie iederiën het gezien wat de prieze ware. Dus hierbej nog enne kier:

* En Panneset, mar dan wel pannen vur op ut dak

* En Wiekendje Meppen, oftewel en magazine 'Weekend' mit en paar opblaoshamers

* En Wiekendje Wellness, oftewel ennen Weekend mit wat ziëp en scrubgrei.

* Vur de eenling en trektocht, oftewel en doës tissues en en vies buukske. Ut schient dat Wout Zanders den gewonne het.

* En de troostpries: En Wiekendje Wenen, oftewel en magazine 'Weekend' mit en does tissues.

* En de kammeraøj van de prins die verklèd won as snoepzak kregte ok enne toepasselijke pries, namelijk ennen snoepzak.

Al mit al kunne we wel zegge dat ut wer en gruwelik moj fiëst was, mit veul lol, veul bier, veul hosse en veul muziek, kiek de foto's mar. We hebbe nou alwer zin ien ut volgende Ald Wieverbal.

Zaoterdag 12 fibbrewarie, Aostrum.

Ut thema was Italiaanse aovend. We han allemol ennen maffia-zonnebril op en Martien en Emiel zellefs en echt Italiaans snörreke. Tot we dor binne kwaame was ut nie gezellig.

Dornao kregte we ut fiëst flink an de geng, en dr was ok nog en spaghetti-vrèt-wedstrijd, die aoveriges gewonne is dur Stef Claessens.

Vrejdag 18 fibbrewarie, Circus Mök.

Un jaorliks terugkierend uitje mit de Prins, Prinses en de raod. We hebbe wer en antal mojje stukke gezien, en t programma was netjes ien mekaar gezet. Ut fiëstje dornao was ok wer gezellig, en uiteraard hebbe we dor os eige stiëntje ok wer an bejgedrage. Dornao wer mit zien alle mit de bus nur d'n terp.

Zaoterdagmiddag 19 fibbrewarie, krantverkoöp

Dit jaor was dur an de krant ennen hoëp veranderd. We han dit jaor ennen andere drukker. Den krant moog dit jaor wat dikker, warschienlik umdat dizze drukker wel langere nietjes haaj. En dit jaor kunde wel es ien de krant zien hoe knap die jonge van de raod eigelik zien. Mar we hebbe wer enne hiële mojje krant, en dor gut ut uiteindelik natuurlik um.

Zondagmiddag 20 fibbrewarie was de prinsereceptie.

Um 11 ovver 2 begos ut programma. Den Prins, Prinses en jeugdtrio stoonde op en rijtje en hebbe hëndjes geschud tot ze dur bijna blaore op han staon. Iederiën kwaam vurbej. De families, de collega's, de raod en nog veul mier meense. En toen kwaame ze: De kammeraøj van Martien en Jessy. Ze ware nor de studio gewist, en han en leuk liedje iengezonge op ut favoriete liedje van Martien. Ze han zellefs en aantal cd's gemakt. Ze hebbe ut moj gezonge, en ut liedje is ien de rest van ut seizoen nog en paar kier gedrèjd. Ik zei en paar kier, mar dat klopt nie hiëlemol. Anders gezeet: As Martien zien kammeraøj iedere kier dat ut nummer

gedrèjd wier en pilske zeuj gève, dan dènk ik dat hej de Vitelia ien mos huure um mit de bulkwages bier te gun haale.

Ok het hej nog es enne kier gezeet dat ut zoë mar us de lèste carnaval gewist kos zien. De joekskepel 'Ieder vur zich', die op de prinserecepsie spulde, het daor al gehuur an gegève. Ze scheie d'r ien ieder geval vur 1 jaor uut. Zeuj ut dan toch waor zien?

Dizze middag zien Jan en mit name Faab ok nog enne kier ien ut zönneke gezet. Hej het nog en mojje onderscheiding van de vorsteraod gekrege.

Mar al mit al:

Prins Martien, Prinses Jessy, Jeugdprins Dennis, Jeugdvorst Tim en Jeugdarrin Nicole kunne terugkieke op ennen hiële mojje dag.

Woensdag 23 fibrewarie was de JVV aovend.

Ut kan kort mar krachtig gezeet werre: Ut was enne mojje aovend. Rene Smedts zurregde vur de muziek, de volksdansgroep het ok wer en paar mojje danse laote zien, Theo de Rijck, alias Theike het enne mojje buut verzurgd, der was ennen Quiz den schienbaar nie zo hiël moeilik was, ok han we nog enne buut van Henk Stevens, en ok ware dr wer en hoëp trotse opa's en oma's die de kleurplate van hun klènkiender ien han geleverd. Ut fiëst was wer èrg geslaagd, en Martien en Jessy hebbe nog es enne kier laote zien dat ze ut danse nie verlierd zien.

Vrejdag 25 fibrewarie was ut aldwieverbal ien Câssele.

Ok dor was nie veul an totdat wej binne kwaame, en dankzej os het zellefs de raod van Câssele enne polonaise geloëpe.

Zaoterdag 26 mârt, de wedstrijd.

Prins Martien was geblessierd, mar dat weerhield um dr nie van um toch nog efkes zien mojje neje shirt te showe op ut veld. Hej haaj op ziene rug nummer 11 staon, en op ziene kop en reserve-prinsemuts. Hej het dan misschien mar 5 minute mitgedaon, mar iederiën was zu afgeleid dur ut mojje shirt dat nao 2 minute de urste tegegoal un feit was.

Dinsdag 1 mart, de twedde wedstrijd.

Oftewel, de dag dat de jonge van de raod bèter mende te kunne volleyballe as prinses Jessy mit ur team. De raod het mar net verlore, mar d'r is wel veul gelache, en dor gut ut um.

Donderdag 3 mârt, carnaval bej de SJMO.

Ok dit jaor ware wej hier wer vur uutgenuedigd. Toen ut nummer (hoe kan ut ok anders) vandaag! Gedrèjd wier kwaame we mit zien alle van alle kante de zaal ien gesturmd. Ut fiëst duurde mar kort, mar dat wil nie zegge dat we nie genote hebbe.

Vrejdag 4 mârt, carnaval van de schôl en de optocht van de jeugd.

Dizzen dag is d'r altied moj te zien dat de volgende generatie carnavalsvierders ok wer goed wèt wor ut um gôt: en moj fiëstje bouwe en veul lol make. Ut was erg gezellig ien zaal, de jeugdraod deuj nog enne mojje dans, vur de kiender was der genoeg vermaak, en vur de raod en paar mojje stagiaires.

's Aoves was wer ut jaorlikse ziekebezuuk.

Dit jaor wier d'r flink wat afgecrost, want Vorst Emiel, Prins Martien en Prinses Jessy zien bej Jan Joosten ien Venlo, bej Ger Loone ien Beukerode en bej Toos Steeghs bej ur thus gewist. Ze vonde ut allemol moj dat ze efkes nève kwaame, en ien Beukerode hebbe ze zellefs den tap nog iets langer ope gehalde vur dit hoëge bezuuk.

Zaoterdag 5 mârt, 's merges, Ut klènste mökske.

Dit jaor ware Fabian en Lonneke mit hun klènste mökske Fem de gelukkigen. Ut Mökske wier ien d'n tuin getimmerd en dornao kregge ze (guj ik vanuut) nog beschuut mit muus.

Smiddags tradisiegetrouw naor de Gemènt. Teminste, dat stoond op de uutnuediging, mar ègewies as wej zien ginge we naor de schouwburg, umdat ut gemèntehuus verbouwd wier. Ut was toch hiël anders as op de gemènt zellef, en volges de mèste dan ok nie zo goed. Ok kregge we mar 2 consumptiebonne per persoën, mar gelukkig kunne ze dor nie telle en kregge we d'r allemol 4. Dornao mit de oëge dicht nève de Roetsj af en naor Oeldere terug.

's Aoves begosse we wer zoëas altied ien de Kerk.

De mis was zoëas altied wer goed. Vur meense die en kort geheuge hebbe han we alwer en nej misbuukske. D'r stoond dan wel nie ien dat de vorst ok nog enne speech duut, mar Emiel haaj um vurberejd dus deuj hej um toch mar, en wej wiëte nou allemol dat hej van Oeldere hald. Goed gesproke en göt zoë dur!

Dornao naor dn Terp vlaai ète en koffie drinke, en vervolges naor ut Mökkebal ien de Linde. Niemes wis natuurlik vanteveure dat DE TOWERBAND dor spulde. En ok han we en gastoptrèje van Prins Martien en Prinses Jessy mit hun liedje: Wej gon d'r tiggengan! Iëne zin is misschien wel de mèst kenmerkende van ut hiële lied, en dat is: 'Wej zinge dan wel nie zu goed, mar fiëste zit os ien ut bloed!' Ik dènk dat niemand ut onèns is mit die twië regels. We hebbe os duk afgevraagd wat Emiel stiekem ien de hallef-ums van Martien het gegooïd, want hej ging d'r echt tiggengan. Ut was wer enne mojje aovend.

Zondag 6 mârt

We begosse rond de middag mit ut ophale van jeugdprins Dennis en Prins Martien en Prinses Jessy. Dit jaor han we vur dizze dag enne fantastisch mojje prinsewage, den vur ut urst sinds jaore wer hiëlemol zellef gemakt is. Dornao han we wer enne lekkere brunch ien d'n terp. Toen we d'n boek d'r vol van han ginge we nor de Liende, wor ut kienderbal begos. Dit jaor han we 'De Voice of Oeldere', en liete de kiender enne dans zien of ze liete huure hoe moj ze kosse zinge. Toen ut afgeloëpe was efkes nor de soos en dornao nor d'n Terp, wor ut ietskes rustiger leek as andere jaore. Mar goed, dr kwaame ok nog twië daag.

Mondag 7 mârt, d'n dag van Alaaf! en Vandaag!

's Merges was ut snotneuzebal. De kiender hebbe zich goed vermakt, en ok alle ballonne zien wer goed nor beneje gekomme, en ok allemol wer mit twintig tegeliek bej pap en mam ien den auto gefrot.

's Middags d'n optocht. We rejde wer vrej veuraan. De Prins en Prinses hun ège liedje was dan wel 'Wej gun dr tiggengan', mar gelukkig is dat ien den optocht nie gebeur. Ja, op en klèn stoeprèndje nao dan.

Nao dn optocht ekkes gauw en frietje Paula of iets anders nor binne werke en dur nor de Liende. Ut was dor ien verband mit enne lange optocht best wel rustig, mar verder was ut enne mojje carnavalsmiddag. Wej hebbe wel iets of wat te duk dezellefde liedjes gehuurd, mar dat moog de pret nie drukke, al stoonde d'r op bepaalde tieje wel veul meense te roëke buute, en ok meense die nie roëke. 's Aoves wer ekkes nor de soos en d'n Terp, wor ut wer utzellefde liedje was. Letterlik en figuurlik.

Dinsdag 8 mârt, d'n dag van ut strikskes wissele.

D'n Oelderse optocht, ien witte strikskes. Volges mej was hej wer langer as vurrig jaor. Wat toch ieder jaor wer opvelt, is dat d'r ien Oeldere wel hiël veul meense wone, mar ze zien d'r wel en bitje utzellefde uut. Toch viende wej ut moj dat ut wer veul bekieks gèft.

Dornao ien de liende de priesuutreiking, ok wer ien de witte strikskes, en toen kos de Buutegewoëne binnezitting beginne, dat was dan wer ien de roëd-gèl-gruune strikskes, of de gruun-gèl-roëje strikskes, as ge um op de kop hat zitte.

De BBZ was ok dit jaor wer en groet succes. Carnavalsvierders, vriende, familie, iederiën kwaan wer op dizze middag af. Ut programma zaat bomvol mit artieste, te veul um op te noeme, dus dat duuj ik ok nie. Ut was gewoën en kei moj fiëst, en iederiën den derbej was den wet dat, en die der nie bej waare die motte der volgend jaor gewoën wél bej zien.

An ut eind van de BBZ was ut tied vur de lèste kier strikskes wissele, want we kosse wer de witte an.

Dornao ginge we vur de latste kier dit jaor nor de carnavalsaovend ien de soos. Um 10 uur was ut vur hun afgeloëpe, en ging de klène mök ien de fik.

Ondertusse was de rest allemol al ien den Terp, wor Prins Martien tigge iederiën zèj dat we d'r nog en uurke flink tiggengan mosse gaon, en dat hebbe we ok gedaon.

Toen wier ut langzaam 12 uur en begos Emiel mit de afsluuting. Fabian, Lonneke, Jan en Anita wiere nur veur geroepe, en dr wier nog iëne kier opgenoemd wat ze allemol vur de vereniging betèkend hebbe. Fabian kreeg nog enne Bronze Spurriemök en de bejbehuurende oerkonde. Dornao wier ut tied vur Martien ziene latste speech. Toen hej de vorst en zien vrouw bedankte miek hej nog en hiël klèn foutje, mar tot daor ging alles goed.

Dornao allemaol nor buute en de mök anstèke. Ut seizoen zit dr wer op, en we kunne mit zien alle terugkieke op enne hiële schonne carnaval. Hopelik dat we volgend jaor wér carnaval meuge viere, want ge wet mar noëit.